

Centralna banka Bosne i Hercegovine

Odjeljenje za statistiku i publikacije

Informacija o rezultatima ankete o inflacijskim očekivanjima iz marta 2022. godine

Upravljanje i stabilizacija inflatornih očekivanja bitno utiče na cjenovnu stabilnost i odraz je povjerenja u mjere monetarne politike, kredibilnost i efikasnost monetarne vlasti. S tim u vezi, CBBiH, kao važan segment komunikacijske strategije, od marta 2019. godine redovno, polugodišnje, provodi Anketu o inflatornim očekivanjima, a ciljem analize i kontinuiranog praćenja inflatornih očekivanja ekonomskih subjekata. Učesnici ankete su predstavnici finansijskog sektora, komercijalne banke i osiguravajuća društva. Aktuelno ubrzanje inflacije, te interes domaćih i stranih institucija dodatno skreće pažnju na rezultate navedenog istraživanja, te se od 2022. godine anketa sprovodi na kvartalnoj osnovi.

Rezultati ankete sprovedene u martu 2022. godine ukazuju na porast kratkoročnih inflatornih očekivanja za tekuću 2022. godinu. Očekivana inflacija za tekuću godinu iznosi 6,7% i znatno je viša u odnosu na nivo od 1,6%, zabilježen u anketi sprovedenoj u septembru prethodne godine. Ovakva promjena u očekivanjima govori da je došlo do nagle promjene u percepciji, što se može dovesti u vezu sa nestabilnostima i poremećajima na globalnom tržištu, a u prvom redu sa rastom cijena energenata i hrane.

Rezultati ankete dalje upućuju da je očekivana stopa inflacije za 2023. godinu na nivou od 4,3%, što je znatno niže od inflatornih očekivanja za tekuću godinu, a što dalje upućuje na percepciju da je skok inflatornih očekivanja u tekućoj godini privremenog karaktera i da se očekuje da bi inflatorni pritisak trebao biti manji u 2023. godini.

